

Tafsiira Suuratu Az-Zumar-Kutaa 16

Description

Kutaa kana keessatti, namoota badii fi miidhaa hojjachuu itti fufan erga akeekachiisee booda namoota tawbachuu fi of fooyyessuu barbaadan abdii ifaa kennaaf.


 فَاصَابُهُمْ سَيِّئَاتٌ مَا كَسَبُوا وَالَّذِينَ ظَلَمُوا مِنْ هَؤُلَاءِ
 سَيُصِيبُهُمْ سَيِّئَاتٌ مَا كَسَبُوا وَمَا هُمْ بِمُعْجِزِينَ

“Bu’aan badaan wanta isaan hojjatanii isaan tuqe. Kanniin irraayyis warri miidhaa hojjatan bu’aan badaan wanta isaan hojjatanii isaan tuqa. Isaan miliqoo hin danda’an.” Suuratu Az-Zumar 39:51

“Bu’aan badaan wanta isaan hojjatanii isaan tuqe.” Kana jechuun ummattoota darban irraa namoonni jecha “kan inni naaf kennname beekumsaani” jedhanii fi badii hojjachuun daangaa darban, jirenya addunyaa keessatti adabbiin cimaan wanta isaan hojjatanii isaan irratti bu’e. Jecha biraatiin, sababa badii hojjataa turaniin adabbiin cimaan isaan irratti bu’e. Fakkeenyaaaf, Qaaruun, Fira’awna, ummanni Samuud, Aad fi kanneen biroo sababa badii hojjataniin adabbiin cimaan isaan irratti bu’ee jira.

“Kanniin irraayyis warri miidhaa hojjatan bu’aan badaan wanta isaan hojjatanii isaan tuqa.” Yaa Rasuula! Ummata kee keessaayyis namoonni zulmii hojjatan bu’aan badaan wanta hojjatanii isaan tuqa. Akkuma namoota isaaniin dura tuqe, adabbiin isaanittis ni bu’a. Isaan Rabbii olta’aa jalaa miliqoo fi bahuu hin danda’an.[\[1\]](#)

Namni yommuu qabeenya baay’ee argatu, qabeenyi kuni adabbi Rabbii waan isarraa deebisu isatti fakkaata. Haala namoota akkanaa Rabbiin subhaanahu wa ta’alaa akkana jechuun ibsa:


 وَقَالُوا نَحْنُ أَكْثَرُ أَمْوَالًا وَأُولَدًا وَمَا نَحْنُ بِمُعَذِّبِينَ

Ni jedhan, “Nuti [isin] caalaa qabeenya fi ilmaan baay’ee qabna. Nuti warra adabamanii miti.” Suuratu Saba 34:35

Kana jechuun: warroonni kafaran warroota amananiin akkana jedhan: nuti isin caalaa qabeenya fi ilmaan baay’ee qabna. Rabbiin waan nurraa jaallateef malee qananii kana nuuf hin kennine. Addunyattis ta’e Aakhiratti nuti warra adabamu miti.[\[2\]](#)

Rabbiin subhaanahu wa ta'aalaaakkana jechuun namoota akkanaa irratti deebii deebisa:

﴿أَوْ لَمْ يَعْلَمُوا أَنَّ اللَّهَ يَبْسُطُ الرِّزْقَ لِمَن يَشَاءُ وَيَقْدِرُ إِنَّ فِي
ذَلِكَ لَآيَتٍ لِّقَوْمٍ يُؤْمِنُونَ﴾
٥٦

“Rabbiin nama fedheef rizqii akka bal’isu, [nama fedhe immoo itti] dhiphisu hin beekanii? Kana keessa namoota amananiif mallattooleetu jira.” Suuratu Az-Zumar 39:52

Qabeenyaan gowwoomu isaaniitii fi wallaalmummaa isaanii irraa kan ka'e "Qabeenya baay'ee qabaachuun haalli namaa gaarii ta'uu agarsiisa" jedhanii akka odeessan erga beeksisee booda, Rabbiin subhaanahu rizqii kenuun kana akka hin agarsiisne isaanitti beeksise. Nama badaa ta'i gaarii ta'i gabroota Isaa keessaa nama fedheef rizqii bal'isa. Ammas, nama gaarii ta'i badaa ta'i nama fedhe irratti rizqii ni dhiphisa. Kuni hundi namoota qoruufi. Yeroo rizqii bal'isuuf "Ni galateefata moo hin galateefatu?" Yeroo rizqii itti dhiphisu immoo "Ni obsa moo hin obsu?" Jechuun namoota qoruu fi haala isaanii ifatti baasuuf, nama fedheef ni bal'isa, nama fedhe immoo itti dhiphisa. Rabbiin nama fedheef rizqii bal'isuun nama san jaallachu hin agarsiisu. Ammas, nama fedhetti rizqii dhiphisuun nama san jibbuu hin agarsiisu. Kana irra, rizqii bal'isu fi dhiphisuun qormaata.

“Kana keessa namoota amananiif mallattooleetu jira.” kana jechuun rizqii bal'isu fi dhiphisuu keessa namoota haqa dhugoomsaniif mallattooleetu jira.[\[3\]](#) Mallatoolee kanniin keessaa tokko rizqii kan bal'isu fi dhiphisuu Rabbii Tokkicha akka ta'e mallatoo agarsiisuudha. Kanaafi, namoonni gariin dandeetti bituu fi gurguruu, humna cimaa ittiin hojjatan qabu. Garuu rizqiin isaan irratti dhiphatti. Namoonni gariin immoo dandeetti fi humna hangas mara hin qaban. Garuu Rabbiin rizqii isaaniif bal'isa. Kuni kan agarsiisu Rabbiin gabroota keessatti too'annaa guutuu akka qabu fi wanta fedhe Kan hojjatuudha. Nama fedheef rizqii ni bal'isa, nama fedhe immoo itti dhiphisa. Kuni garuu sababa rizqii ittiin argatan hojjachuu hin qabnu jechuu miti. Sababoota rizqii ittiin argatan hojjachuun barbaachisadha.
[\[4\]](#)

Nama Cubbuu/diliitti Taree Abdachiisu

﴿قُلْ يَعِبَادِيَ الَّذِينَ أَسْرَفُوا عَلَىٰ أَنفُسِهِمْ لَا نَقْنُطُوا مِنْ رَّحْمَةِ
الَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْغَفُورُ الرَّحِيمُ﴾
٥٣

“Jedhi, ‘Yaa gabroottan Kiyya kan lubbuu ofii irratti daangaa dabartan! Rahmata Rabbii irraa abdii hin muratinaa. Dhugumatti Rabbiin balleessaa hundaa ni araaramaa. Inni Araaramaa, Rahmata godhaadha.” Suuratu Az-Zumar 39:53

Jedhi yaa Rasuula ykn yaa nama gara Islaamatti namoota waamu! Gooftaan keessanakkana jechuun isin waama: “**Yaa gabroottan Kiyya kan lubbuu ofii irratti daangaa dabartan!**”


Asitti gabroonni Muslimas ta’i kaafiras ta’i namoota hunda of keessatti hammata.

“kan lubbuu ofii irratti daangaa dabartan!”


Tika (eeggumsa) keessatti nafsee irratti daangaa darban. Dirqamni nama irra jiru nafsee ofii tiiksu keessatti tika haqaa tiksudha. Kunis kan ta’u, *wanta nafsee isaa fooyyessu hojjachuu fi wanta ishii balleessu irraa fagaachuni*. Inni yoo kana hin hojjatin, nafsee ofii irratti daangaa darbee jira.

Asitti **Israafa** jechuun nafsee eegu keessatti daangaa darbuudha. Kunis badiitti of darbuu yookiin Rabbiif ajajamuu irraa of dhoowwudha. Fakkeenyaf, namni hate, hanni nafsee irratti daangaa darbuudha. Sababani isaas, dirqamni isarra jiru, nafsee hanna irraa eegudha. Haaluma kanaan, namni khamrii (wanta nama macheessu) dhugee, nafsee ofii irratti daangaa darbee jira. Akkasumas, namni sanamaaf (siidaaf) sujuude, Rabbiin ala wanta bira gabbare (waaqefate) jira. Kanaafu, nafsee ofii irratti daangaa darbee jira.

Namni yommuu badii hojjatu nafsee ofii irratti daangaa darba. Sababni isaas, adabbii Rabbiitiif of saaxila. Rabbiin subhaanahu wa ta’alaa namootaaf daangaa kaa’ee jira. namni daangaa san darbe adabbii Isaatti kufa. Fakkii armaan gadii irra yommuu ilaallu, namni badii hojjatu ykn wanta itti ajajame dhiisu sarara diimaa keessaah buhuun dukkanatti of darba. Dukkanni kuni adabbii adda addaatti. Kan akka jeequmsa, dhiphachuu, halkan hirriba dhabuu, rakkoo adda addaati fi kanneen biroo. Namni dafee tawbachuu gara geengoo magarisaa yoo hin deebi’in, dukkana kana keessa turuun dhumarratti adabbii guddaatti mucucaata. Adabbiin kunis Jahannami. Rabbiin kanarrraa nagaha nuu haa baasu.



Kanaafu, namni badii hojjatuu fi wanta itti ajajamee dhiisu nafsee ofii irratti daangaa darbee jiraa jechuudha. Sababni isaas, dukkanaa cimaa fi adabbii adda addaatif of saaxila. “Namni daangaa diimaa kana darbuun dukkanatti yoo kufe, karaan dukkana kana keessaa ittiin bahan jiraa?” jedhee namni tokko gaafachu danda’ a. Eeyyeen ni jira. Dukkana kana keessaa karaan geengoo magariisaatti deebi’ uun nagahaa fi ifa itti argatan, tawbachuu fi Rabbiin araarama kadhachuudha.



“Gooftaa keessan araarama kadhaa, ergasii gara Isaatti deebi’aa. Dhugumatti Gooftaan kiyya, rahmata godhaa, jaallataadha.” Suuratu Huud 11:90

“Rahmata Rabbii irraa abdii hin muratinaa.” Yaa gabroottan nafsee ofii irratti daangaa darbitan! Badiin keenya baay’ atee jechuun rahmata Rabbii irraa abdii hin kutinaa. Rabbiin araarama kadhaa isiniif araaramaati, iimaanaa fi Isaaf harka kennuun gara Isaatti deebi’ a (tawbadhaa) tawbaa isin irraa qeebalaati.[\[5\]](#)

Rahmata Rabbii irraa abdii murachuu jechuun “Rabbitin rahmata naaf hin godhu” jedhanii abdii kutuudha. Namni rahmata Isaa irraa abdii yoo kute, badii hojjachu itti fufa, dallansu Jabbaar (Rabbii) ofirratti fida, adabbiif of saaxila. Kanaafu, Yaa gabroottan nafsee ofii irratti daangaa darbitan! Badiin keenya baay’ atee jechuun rahmata Rabbii irraa abdii hin kutinaa. Sababni isaas, **“Rabbitin balleessaa hundaa ni araarama. Inni Araaramaa, Rahmata godhaadha.”**

Nama tawbatee fi araarama kadhateef balleessaa fi badii hundaa erga araaramee, abdii kutuun maaliif barbaachise ree?

Aayah keessatti jechi “**yaghfiru** (ni araarama)” jedhu, jecha al-maghfirah jedhamu irraa kan fudhatameedha. **Al-Maghfirah** jechuun badii haguuguu fi irra darbuudha. Hiikni isaa badii haguugu qofaa miti. Sababni isaas, jechi al-maghfirah jedhu jecha al-mighfara jedhu irraa kan fudhatameedha. Al-mighfara jechuun yeroo lolaa (waraanaa) eeggumsaaf wanta mataa irratti dirataniidha (kaa’ ataniidha). Hiikni itti dhiyoon “koofiyaa sibiilaa (ingiliffaan ‘helmet’)” dha.

Al-mighfar kuni dhimmoota lama kan of keessatti qabatedha: haguuguu fi eeggumsa. Koofiyaan sibiilaa (Al-mighfar) yeroo lolaa godhatan, mataas ni haguuga, miidhaa irraayyis nama eega. Kanaafu, **maghfiratu zunuub (badiiwan araaramu)** jechuun *badii dhoksuu fi irra darbuudha*. Ati yommuu Allaahumma-ghfirlii (Yaa Rabbii naaf araarami)” jettu waa lama kadhatta: Rabbiin subhaanahu namoota irraa badii kee akka dhoksuu fi badii kee akka siif irra darbu.

Aayan tuni warra tawbataniif akka taate beektonni irratti wali galanii jiru. Badiin hanga fedhe haa baay’ atu namni dhugaadhaan tawbatee fi araarama kadhate, Rabbiin ni araaramaaf. Namoota hin tawbannee ilaachisee immoo Rabbiin olta’ aan akkana jedhee jira:

إِنَّ اللَّهَ لَا يَغْفِرُ أَن يُشْرِكَ بِهِ وَيَغْفِرُ مَا دُونَ ذَلِكَ لِمَن يَشَاءُ وَمَن
يُشْرِكُ بِاللَّهِ فَقَدِ افْتَرَ إِثْمًا عَظِيمًا

٤٨

“Dhugumatti Rabbiin Isatti waa qindeefamuu hin araaramu. Waan sanaa gadii nama fedheef ni araarama. Namni Rabbitti qindeesse, dhugumatti cubbuu guddaa uumee jira.” Suuraa An-Nisaa 4:48

Namni osoo hin tawbatin shirkii irratti du’e, Rabbiin irraa araarama hin argatu. Garuu badii shirkii gadi jiru yoo hojjate, fedhii Rabbii jala jira. Yoo fedhe ni araaramaaf, yoo fedhee immoo ni azzaba (ni adaba). Kanaafu, namni haalota lama qaba:

Haalli 1ffaan- tawbaadha. Badiin isaa hanga fedhee haa guddatu yoo dhugaan tawbate, araarama ni argata. Kana jechuun badiin isaa ni haguugamaaf, wanta hojjateef hin adabamu. Fkn, shirkii irraa dhugaan yoo tawbate, araarama ni argata.

Haalli 2ffaan- tawbachuu dhiisu- Haala kana keessatti akkana jenna, “Shirkii hin araaramamu. Shirkii gadi wanti jiru fedhii Rabbii jala jira.” Ragaa kanaa aaya armaan olii suuratu An-Nisaa dhiyeessun ni danda’ama. (Wanti asitti hubatamu qabu: Namni osoo hin tawbatin shirkii irratti du’e, araarama hin argatu. Garuu du’ aan dura shirkii irraa dhugaan yoo tawbate, araarama ni argata.)

Namoonni badii hojjachuun nafsee ofii irratti daangaa darban yommuu badii irraa dhoowwitu, aayah armaan olii ragaa godhachuun akkana jechuu danda’u: “**Waan sanaa gadii nama fedheef ni araarama.**”

Salphumatti akkana isaaniin jechuu dandeenyaa: ati namoota Rabbiin araaramufi fedhe keessaa tokko ta'uu siritti jala murtee ni mirkaneessitaa?

Deebiin: lakki. Kanaafu, ati balaa guddaa irra jirta. Ati amma sababa adabbiitti nama geessu hojjattee jirta. Siif araaramamu ykn araaramamu dhiisun gara fedhii Rabbi azza wa jalla deebi'a.[\[6\]](#) Kanaafu, namni "Rabbit naaf araarama" jechuun badii itti fufuu hin qabu. Kanaafi itti aanse ni jedha:

Adabbiin isinitti dhufuu dura gara Gooftaa keessanii deebi'aa, Isaafis harka kennaa. Sana booda hin tumsamtanu." Suuratu Az-Zumar 39:54

Ibsa aayah tanaa In sha Allah kutaa itti aanu keessatti ilaalla...

Kitaabban wabii:

[\[1\]](#) Tafsiiru Muyassar-464, Tafsiiru Qur'aanil kariim-Suuratu Zumar-fuula 359-360

[\[2\]](#) Tafsiiru Muyassar-432

[\[3\]](#) Tafsiiru xabarii-20/224

[\[4\]](#) Tafsiiru Qur'aanil kariim-Suuratu Zumar-fuula 363

[\[5\]](#) Ma'aariju tafakkuri-12/255

[\[6\]](#) Tafsiiru Qur'aanil kariim-Suuratu Zumar-fuula 367-371

Date Created

March 10, 2020

Author

admin